

Prome piedra a wordo poni na proyecto di Hospital nobo

ORANJESTAD - Ayera a tuma luga e inicio di e proyecto mas grandi den su sorto na Aruba. Un proyecto cu ta encera mehoracion, expansion y modernisacion di dr. Horacio Oduber Hospital (HOH). E la tuma su tempo di preparacion, entro otro pa haci cambionan di ley, prome cu por a yega asina leu cu e señal pa trabounan cuminsa por wordo dunaayeratardi riba e parkeerplaats dilanti di e departamento di SpoedEisende Hulp (SEH).

Despues di añanan di trabounan preparativo, ayeratardi ceremonia di groundbreaking ta tuma luga. Pa tur esnan envolvi, pa tur cu a traha dia y nochí, pa e pashent como tambe e dunando di cuidu, e tabata un momento di inmenso orguyo ora cu literalmente e piedra angular di nos comunidad wordo poni dunando inicio na un proyecto cu ta bay brinda pueblo un hospital di calidad halto, di bon cuidu na unda e pashent ta para central.

Duracion proyecto
E proyecto titanico aki ta bay

tin un duracion di 4 año y mei. Su renobacion ta encera fase IA, cu ta e toren nobo na unda e camanan ta bay ta, fase IB ta e Medical Office Building, unda specialistanan ta bay tin nan oficina y fase II ta renobacion di e parti existente di hospital.

Ta evidente pa remarca cu mescos calidad di cuidu, privacidad di e pashent ta un punto central den renobacion di hospital. E departamento di SpoedEisende Hulp ta bay haya dos entrada, pa asina pashentnan di trauma (accidente y otronan cu ta bin cu ambulance) no mester pasa mas dilanti tur hende den gang, pero ta bay directo den e sala di SEH.

Un paso importante den garantia privacidad di e pashent. Tambe e cambianan cu awor tin seis pa shete hende den nan, ta bay tin solamente un te dos pashent. Ta masha hopi trabou di logistica a wordo haci door di tur partido envolvi pa por a yega na e puntonan esencial y importante aki.

Director di AIB Giel: "Mi ta kere e palabra satisfecho ta na

su luga. E tabata un proceso largo y intensivo. E la splica cu no ta solamente e aspectonan di financiamiento y construccion a traha riba nan, pero tambe e dignidad di e pashent y eficiencia di operacionnan di hospital. "Di loke mi a mira, mi ta hopi contento cu nos por realisa esaki lo mas pronto posibel. Mi ta felicita pueblo di Aruba cu e proyecto aki."

Desaroyo na 2011
Un di e prome pasonan cu a wordo tuma na 2011 tabata pasamento di un acta notarial door di Minister Sevinger caminda a pasa dos tereno erfpacht grandi pa SOGA (Stichting Onroerend Goed Aruba) pa expansion di dr. HOH. SOGA na su turno a cuminsa haci e tramitenan financiero necesario. E proyecto aki no ta encera solamente e parti fisico di hospital, pero tambe hopi otro cambio riba diferente tereno cu ta necesario, manera un miho calidad di cuidu, un SpoedEisende Hulp cu ta miho ekipa pa por brinda miho asistencia, acomodacion di specialistanan y mucho mas.

E proyecto ta uno hopi bon pensa y hinca den otro y ora

e ta cla, Aruba tin un hospital moderno cu tur facilidad cu e tin mester.

Desaroyo na 2012
2012 a tuma lugar firmamento entre SOGA, AIB y Buro di Arkitekto Bermello, Ajamil y Partners pa e siguiente paso di e proyecto aki. Pa AIB a firma director Giel, pa SOGA sr. Hodgson y sr. Bermello di Buro di arkitekto BAP.

Na e ocasion ey Minister Sevinger mescos tambe cu e minister di Salubridad di e tempo ey Visser bisa di ta contento cu despues di añanan di deliberacion y discusion porfin por cuminsa cu un proyecto di tal indole manera esun di expansion di hospital.

Desaroyo na 2013
April 2013 firmamento di e contract pa proyecto di renobacion y ampliacion di dr. Horacio Oduber Hospital a keda concretisa. Esaki ta un proceso cu e institucion financiero AIB a inicia tres año pasa riba peticion di Stichting Onroerend Goed Aruba.

Na e ocasion ey AIB a bisa di tin tur confianza di por completa esaki cu e mesun éxito

cu el a haci cu varios otro proyecto durante e ultimo 14 añanan.

Aruba Investment Bank ta basa su mes riba e experiencia exitoso cu nan tin cu FDA pa tuma over e maneho di SOGA. Algun ehempel ta edificio di DOW na Wayaca, SIAD na Camacuri y ATA riba boulevard.

E garantia cu ta duna pueblo di Aruba cu ta caba cu e proyecto exitosamente ta cu e fondonan necesario tey caba. "A caba di firma e contract di construccion; no por haci esey si bo no tin e fondonan pa construi," Giel a enfatisa.

"Pues comunidad por ta sigur cu no ta djis un ponemento di piedra tin of ta un firmamento cu ta bay dura prome cu nan mira construccion." Di awor pa dilanti AIB ta guia e proceso.

A forma un BouwTeam cu ta encarga den nomber di AIB/SOGA pa supervisa e ehecucion general, cu arkitekto, contratista, percura pa tur cos ta cana segun presupuesto y traha cu hospital pa loke nan mester pa sigui opera. □